

Peqqussutissatut siunnersuummut oqaaseqaatit

Oqaaseqaatit naliginnaasut

1. Aallaqqaasiut

Allannguutissatut siunnersuutip uuma siunertaaraa, § 8, imm. 1-mi aalajangersakkap oqaatsitigut erseqqissarnera kalaallisoornerata qallunaatoorneranut naapertuuttunngornissaa qulakkeerniarlugu.

Uumalu allannguutitut siunnersuutip siunnertaraattaq Inatsisartut UKA 2007-mi imm. 123 aaliangingat malinniarlugu. Taamani allannguinnissamut siunnersuuteqarnissaminnut Naalakkersuisut peqquneqaramik § 23-mi Pisortanit ikiorsissutit pillugit Inatsisartut peqqussutaat nr. 15, 20. november 2006-imeertumi, periarfissaqalersillugu illerfiit angallannissaannut aningaasartuutit kommunenit matussusersinnaalerlugit.

2. Aningaasatigut allaffissornikkullu kingunerissasat

Allannguutitut siunnersuutip aningaasatigut allaffissornikkulluunniit kinguneqassanngilaq.

Inatsisartut peqqussutaat naapertorlugu pisortanit ikiorsiissutit atorlugit, tamarmik immikkut naliliiffiqineqareerlutik, toqusup illerfiata toquffianiit kommunemut angerlarsimaffianut nassiunnera kommuneniit akilerneqartarnikuuvoq, taannalu aalajangersagaq atuunnikuuvoq piffissami 1982-2007-imut. Ullumikkut peqqussutip pisortanit ikiorsiissutit pillugit atuutilerneraniit inatsisitigut tamanna tunngavissaaruppoq. Taamaattorli peqqussummu ullumikkut atuuttumut tunngatillugu aningaasatigut naatsorsuinermi ilaasimanngilaq, tassami kommunet aningaasatigut sipaaruteqarsimagaluarput. Taamaattumik illerfiit angallannerinut aningaasartuutit uunga inatsimmut naatsorsuinermi ilaassanngillat.

Naatsorsuutigineqanngilaq pisortanut allaffissornikkut kinguneqarumaartoq.

3. Inuussutissarsiornermi aningaasaqarnikkut aqutsinermilu kingunerisassat

Siunnersuut aningaasaqarnikkut kinguneqarnissaa naatsorsuutigineqanngilaq.

4. Avatangiisitigut pinngortitamilu kingunerisassat

Siunnersuut avatangiisitigut pinngortitamullu tunngasutigut kinguneqarnissaa naatsorsuutigineqanngilaq.

5. Innuttaasunut aqutsinikkut kingunerisassat

Siunnersuut aqutsinikkut innuttaasunut kinguneqarnissaa naatsorsuutigineqanngilaq

6. Kingunerisassat allat pingaarnerit

Siunnersuutip allatigut pingaarutilinnut kinguneqarnissaa naatsorsuutigineqanngilaq.

7. Naalagaaffeqatigiinnermut tunngatillugu

Siunnersuut Naalagaaffeqatigiinnermut tunngatillugu kinguneqarnissaa naatsorsuutigineqanngilaq.

8. Pisortanik kattuffinnillu il.il tusarniaaneq.

Siunnersuut tusarniaatitut ukununnga nassiunneqarnikuvoq: KANUKOKA, Aningaasaqarnermut Naalakkersuisoqarfik, Peqqissutsimut Naalakkersuisoqarfik, Nunamut namminermut, Pinngortitamut Avatangiisinullu Naalakkersuisoqarfik, Utoqqaat Nipaat, Kommunit naatsorsuuserissarfiat Isumaginninnermullu Naammagittaalliuuteqartarfimmut.

Pisortat kattuffiillu tusarniaanermut uku akissuteqarsimapput:

KANUKOKA

Oqaatigineqarpoq pineqartoq Kalaallit Nunaanni illoqarfigisami nunaqarfigisamiluunniit kingullermik najugaqarfigisami avataani toqusimappat, toqusullu pigisaasa imaluunniit qanigisaasut aningaasartuutit akilersinnaanngippatigit, taava ajornartorsiut maanna Inatsisartut pisortanit ikiorsiissutit pillugit siunnersuutigisaannit naapertuunnerusumik aaqqinneqartariaqartoq. KANUKOKA isumaqarpoq peqqinnissaqarfik taannaasariaqartoq napparsimasup najukkamut uternissaanut akisussaasusaaq. KANUKOKA-p oqaatigivaa ilaqutariit qanigisaminnik annaasaqarnerup saniatigut najukkami ilaqutaasup ilineqarnissaanut annertuumik akiligassinneqarnissaat ataqqininnerunngitsooq. KANUKOKA-p nangilluni oqaatigivaa qanigisaasunut akiliisinnaassuseqanngitsunut toqusoornerup saniatigut ilaqutaasup najukkamini ilisaanissaanut kommunimut qinnuuloortariaqarnissaaq suli ajornerusooq,

Oqaatigineqartut tusaatissatut tiguneqarput. Inatsisartulli 2007-mi ukiakkut ataatsimiinnermi aalajangersimavaat, Inatsisartut pisortanit ikiorsiissutit pillugit

peqqussutaanut periarfissaliisoqassasoq kommunit illerfiit angallanneqarnerannut aningaasartuutinik matussusiiisinnaangorlugit. Inatsisartut Ilaqutariinnut Ataatsimiisitaliaata isumaliutissiissusiamini oqaatigivaa, illerfiit angallanneqarnerannut kommunit tapersiissutissaat inunnut malittarisassat naapertorlugit pisortanit ikiorserneqarnissamut ikiorserneqarsinnaasunut tunngatinneqassasut. Inatsisartut Ilaqutariinnut Ataatsimiisitaliaata nangilluni oqaatigivaa, pisami sapinngasamik kommunini tamani assigiimmik atugassaqartitsisumik malittarisassiuussisoqassasoq, allannguinerlu nunatta karsianut nanertuutaassanngitsoq.

Utoqqaat Nipaata

Utoqqaat Nipaata peqqussummut siunnersuut taperserpaa.

Uku oqaaseqaateqanngillat:

Aningaasaqarnermut Naalakkersuisoqarfik aamma Isumaginninnermi Naammagittaalliuuteqartarfik

Uku tusarniaatitsinnermi akissuteqanngillat:

Peqqinnissamut Naalakkersuisoqarfik, Nunamut namminermut, Pinngortitamut Avatangiisinullu Naalakkersuisoqarfik aamma Kommunit kukkuneruisuisi

Peqqussutissatut siunnersuummi aalajangersakkanut ataasiakkaanut oqaaseqaatit

§ 1-mut

Nr. 1-mut

Siusinnerusukkut oqaaseqaatit innersuussutigineqarput.

Nr. 2-mut

Oqaaseqatigiit "Pineqartoq Kalaallit Nunaanni.....toqusimappat" tassani killiliinerup nassataraa, taamaallaat illerfimmik angerlaallugu angallassineq pisortanit ikiorsiissutigineqarsinnaammat, pineqartoq Kalaallit Nunaanni toqusimappat. Killiliinerup taassuma maani inuttaasoq Kalaallit Nunaata avataani, soorlu Rigshospitalimi katsorsartinnermi nalaani imaluunniit ilinniartuunermi

nalaani imaluunniit sulingiffeqarluni angalanermini toqusimappat illerfiata angallanneqarnerannut pisortanit ikiorneqarsinnaanermut ilaatinneqanngillat.

Aalajangersagaq atorneqartassaaq qanigisat aningaasartuutitik akiliisinnaanngikkaagata, aammalu pigisat naliisa aningaasartuutit matussusersinnaanngikkaagatigit. Oqaatsip ”ilaqutariit” imarai qaniginerpaasat, soorlu katissimasaq / aaliangersimasumik inooqatigisaq, meeqqat, qatanngutit angajoqqaallu.

Aalajangersakkami uani pisortanit ikiorsiissutit inunnut tunniunneqarsinnaapput, pisortatigit ikiorsiissutitik inatsisit malillugit pisinnaasunut, malitsigisaanilli Kalaallit Nunaata avataani najugalinnut tunniunneqarsinnaanatik.

Aalajangersakkap qulakkeerniarpaa eqqartukkami kommuneni tamani assigiimmik pissuseqarnissaq.

Pisortanit ikiorsiissutitut peqqussummi § 19, 1. januar 1984-miit 31. marsi 2007-imut atuuttoq naapertorlugu, ilisinermit naleqquttunik aningaasartuutitik ikiorsiissoqarsinnaavoq pisariaqartitsineq naapertorlugu. Aalajangersagaq taanna tunngavigalugu ilaatigit kommunit toqusup illerfiata uninngavigisaanit najungarivitaanut nassiunneqarnissaanut ikiorsiisarnikuupput.

Nr. 3-mut

Aalajangersakkami aalajangersaavigineqarpoq illerfiup angallanneqarneranut aningaasartuutaajumaartussat aalajangeruminaatsinneqarsimappata, taamaanneranilu illerfiup angallanneqarneranut ikiorsiisoqarsinnaatillugu, kommunalbestyrelsip ikiorsiissutitut siumoortumik akiliutissamik tunniussisinaanera. Aningaasanik tiguisup tiguisinermini atsiormigut uppersassavaa, ikiorsiissutip utertinniarneqarsinnaanera. Pigisat naligisa nalunaarsornerat naammassineqareerpat aningaasartuutit aqqivigineqassapput.

Aalajangersagaq ilanngunneqarpoq, ingerlatsinermit allaffiup illerfimmik angerlaallugu angallassinermut pisortanit ikiorsiinissaq aatsaat aaliangiiffigisinaanammagu pigisat naligi qulakkeerneqareerpata. Ilisisoqarnerani ikiorsiisarnermi malittarisassat atuuttut assigai.

Taamatut qulakkeerrinneq tamatigit ilisisoqannginnerani pisinnaasannilaq. Qulakkeerrinneqqaarnissami eqqartuussiviit ilanngutitinneqartariaqassappata (Eqqartuussivimmi imaluunniit Kalaallit Nunaanni Eqqartuussiveqarfimmi toqusimasut pigisaanik agguassisarnermi) kingusinnerusukkat aatsaat ilisisoqarnerani qulakkeerneqarsinnaasarpoq.

Aaliangersagakkap uuma kommunalbestyrelse piginnaaffilerpaa ilisinermit aamma illerfimmik angallassinermi siumoortumik aningaasartuutitut tunniussisinaaneranik.

Til § 2

Inatsisartut peqqussutaata 1. juli 2010-mi atuutilernissaa siunnersuutigineqarpoq.